

历代
笔记
名著
丛书



徐霞客游记

下

〔明〕徐弘祖 著
煙照 方岩 校点
闫若冰

齊魯書社

历代笔记名著丛书

徐霞客游记

下

■ (明) 徐弘祖 著

煙 照

方 岩

校 点

闫若冰

齊魯書社



图书在版编目(CIP)数据

徐霞客游记/(明)徐弘祖著. —济南: 齐鲁书社,
2007.7

(历代笔记名著丛书)

ISBN 978-7-5333-1801-7

I. 徐… II. 徐… III. ①游记—中国—明代②历史地理—中国—明代 IV. K928.9

中国版本图书馆 CIP 数据核字(2007)第 037686 号

历代笔记名著丛书

徐霞客游记(上下册)

[明]徐弘祖 著

出版发行 齐鲁书社

社 址 济南经九路胜利大街 39 号

邮 编 250001

网 址 www.qlss.com.cn

电子邮箱 qlss@sdpress.com.cn

印 刷 山东新华印刷厂

开 本 880 × 1230 / 32

印 张 27.25

字 数 734 千

版 次 2007 年 7 月第 1 版

印 次 2007 年 7 月第 1 次印刷

标准书号 ISBN 978-7-5333-1801-7

(上下册)定价: 45.00 元

目 录

出版说明	1
季序	1
杨序	2
徐序	4
例言	6

卷一上

游天台山日记浙江台州府	1
游雁宕山日记浙江温州府	4
游白岳日记徽州府	7
游黄山日记徽州府	9
游武彝山日记福建建宁府崇安县	13
游庐山日记江西九江府山之阴为九江府山之阳为南康府	17
后游黄山日记	22
游九鲤湖日记福建兴化府仙游县	24

卷一下

游嵩山日记河南河南府登封县	28
游太华山日记陕西西安府华阴县	33
游太和山日记湖广襄阳府均州	35
前闽游日记	38
后闽游日记	43
后游天台山日记	48
后游雁宕山日记	53
游五台山日记山西太原府五台县	59
游恒山日记山西大同府浑源州	62

卷二上

浙游日记	65
江右游日记	78



卷二下

楚游日记…………… 123

卷三上

粤西游日记一…………… 195

卷三下

粤西游日记二…………… 262

卷四上

粤西游日记三…………… 326

粤西游日记四…………… 384

卷四下

黔游日记一…………… 451

黔游日记二…………… 476

卷五上

滇游日记一(缺)…………… 493

补 录……………

游太华山记…………… 494

滇中花木记…………… 496

游颜洞记…………… 497

随笔二则…………… 498

盘江考…………… 501

滇游日记二…………… 504

卷五下

滇游日记三…………… 525

卷六上

滇游日记四…………… 556

卷六下

滇游日记五…………… 591

卷七上

滇游日记六…………… 615

卷七下

滇游日记七…………… 645

卷八上

滇游日记八…………… 672

卷八下

滇游日记九…………… 707

卷九上

滇游日记十…………… 739

卷九下

滇游日记十一…………… 765

补 录……………



永昌志略…………… 786

近腾诸彝说略…………… 787

卷十上

滇游日记十二…………… 789

卷十下

滇游日记十三…………… 820

补 录

鸡山志目…………… 828

鸡山志略一…………… 829

鸡山志略二…………… 832

丽江纪略…………… 834

法王缘起…………… 834

溯江纪源 一作

《江源考》…………… 835

附 录

一、徐霞客传

…………… 钱谦益 838

二、徐霞客墓志铭

…………… 陈函辉 840

三、四库全书总目提要


〔徐霞客游记条〕

…………… 纪晓岚 847

四、校勘辩讹

…………… 徐 镇 848

校点后记…………… 853



徐霞客游记卷四下

黔游日记一

戊寅三月二十七日 自南丹北鄙邕歹村，易骑入重山中，渐履无人之境。五里，逾山界岭。南丹，下司界。又北一里，逾石隘，是为艰坪岭。其石极嵯峨，其树极蒙密，其路极崎岖。黔、粤之界，以此而分；南北之水，亦由此而别。然其水亦俱下都泥，则石隘之脊，乃自东而西度，尽于巴鹅之境，而多灵大脊，犹在其东也。北下一里，就峡西行，一里，始有田塍；又半里，峡转北，坞始大开。又北一里，有村在西坞中，曰由彝。此中诸坞，四面皆高，不知水从何出，然由彝村南石壁下，有洞东向，细流自畦中淙淙入，透山西而去，固知大脊犹在东也。至此南丹差骑辞去。由彝人始许夫骑，久乃不至，促久之，止以二夫负担去。余独坐其栏，从午至暮，始得骑。西北二里至山寨，则寨人已送担亦前去。乃由其东上岭，越脊北下一里，行壑中，又北一里再越岭脊，下行峡中。壑圆而峡长，南北向皆有脊中亘，无泄水之隙，而北亘之脊，石齿如锯，横锋竖锷，莫可投足。时已昏暮，跃马而下，此骑真堪托死生也。越脊，直坠峡底，逾所上数倍，始知前之圆壑长峡，犹在半山也。峡底有流从南脊下溢，遂滔滔成流。随之西向行，共里许，有村在南山麓，担夫已换去；又骑而西半里，担夫又已去。盖村人恐余止其家，故亟换之行。而又无骑换，骑夫不肯前，余强之暗行。西北半里，有溪自东而西，

横堰其中，左右渊深。由堰上北度，马蹄得得，险甚。又西转，过一村。半里，由村西而北向逾岭，始与双担同行，暗中呼声相属，不辨其为石为影也。共二上二下，遂行田塍间。共五里，过一寨，排门入，居人颇盛。半里，复排一门出，又行田塍中。一里半，叩门入旧司，门以内茅舍俱闭，莫为启。久之，守一启户者，无茅无饭而卧。

上、下二司者，即丰宁司也。濒南界者，分为下司，与南丹接壤。二司皆杨姓兄弟也，而不相睦。今上司为杨柚，强而有制，道路开治，盗贼屏息。下司为杨国贤，地乱不能辖，民皆剽掠，三里之内，靡非贼窟。其东有七榜之地，地宽而渥，桀骜尤甚。其叔杨云道，聚众其中为乱首，人莫敢入。旧司者，下司昔日司治也，为上司所破，国贤移居寨上。按：丰、宁二司皆贵州都匀府属。其兄弟相贼而莫问，岂羁縻之道固应然耶？寨在南山之麓，与旧司南北相对，中隔一坞，然亦无奇险也。

二十八日 平明起，雨霏霏下。余令随夫以盐易米而炊。余以刺索夫于南寨，国贤避不出，托言与上司不合，不敢发夫，止许护送者两三人送出境。余饭而待之，送者亦不至，乃雇夫分肩行李，从旧司北向逾岭行。共三里余，下至饿鬼桥，有小水自东北注西南，小石梁跨其上。御人者每每横行于此。又北二里，逾岭，已为上司界。下岭二里，有村在西坞，而路东有枫木树对之。又东北逾岭二里，有村在东坞，其前环山为壑，中洼为田。村倚东峰，有石崖当村后。路循西岭，与村隔垄相向，始敢对之息肩。又西北逾岭二里，转而西向行，于是峡大开，南北相向，南山下村居甚稠，北山则大路倚之。西行五里，路复西北逾岭。盖此地大山在东北，路俱缘其西南上，虽有升降，然俱上多下少，逶迤以升者也。又西北二里，逾岭路北有峰，回亘层叠，俨若天盘龙髻；崖半有洞，门西向，数十家倚之。路乃北转，又一里，越其西冈北向下。西冈者，大山分支，西突为盘髻峰，其下

横冈西度者也。西冈之北，山又东西排闥。北望西界山，一圆石高插峰头，矗然倚天之柱，其北石崖回沓，即上司治所托也。东界土山，即路所循而行者。共北五里，路与西界矗柱对。

又北二里，忽山雨大至。担夫停担，各牵笠蔽雨，余持伞亦蔽一挑。忽有四人持镖负弩，悬剑囊矢，自后奔突而至。两人趋余伞下，一人趋顾仆伞下，一人趋担夫笠下，皆勇壮凶狞，似避雨，又似夹持。余甚恐。问余何往，余对以都匀。问余求烟，余对以不用。久之，雨不止而势少杀，余曰：“可行矣。”其人亦曰：“可去。”余以为将同往而前者，及余行而彼复止。余益知其必非良人，然入其吻而不下咽，其心犹良也。更北半里，转而西，又一里余，有营当两界夹中阜上，壁垒新整。由其下又西一里，入上司南门，有土垣环绕，门内即宿铺。江西人。自下司至此，居舍中各半土半栏。时雨过街湿，余乘湿履，遂由街北转而西，有巨塘汇其内，西筑堤为堰，甃为驰道甚整。又北半里，直抵囤山东麓，北向入一门。有石罅一缕，在东麓下，当其尽处，凿孔如盂，深尺许，可贮水一斗。囤上下人，俱以盞候而酌之，谓其水甘冽迥异他水。余酌而尝之，果不虚也。由此循囤麓转入北峡，峡中居人甚多，皆头目之为心膂寄者，又编竹架囤于峡中，分行贮粟焉。由北峡西向行，已入囤后，有脊自西北连属于囤，乃囤之结蒂处也。脊东峡中，有洞倚囤麓，其门北向，甚隘而深。有二人将上囤，余问：“此洞深否？”云：“其洞不深。上至囤半，有大洞颇深而有水，须以炬入。”由下仰眺，囤上居舍累累，惟司官所居三四层，皆以瓦覆，以垩饰。囤险而居整，反出南丹上也。余乃随其人拾级上囤，其级甚峻，而甃凿开整。竭蹶而上，共半里，折而东，有楼三楹跨路间，乃囤半之隘关也。洞在中楹之后，前为楼所蔽，不可见。有男、妇各一，炊中楹下。二人指余入，遂登囤去。余索炬于炊者，则楹后即猪栏马栈。践之下洞，洞门北向，洼坠而下，下皆污土，上多滴沥，不堪驻足，乃

复出而下。先是令一夫随行，至脊下不敢登，余乃独上。然圉上之形，可以外瞭而见，惟此洞为楼掩，非身至不知也。仍由旧路里馀，返宿舍，则已薄暮矣。炊饭亦熟，遂餐而卧。

上司土官杨柚，由长官而加副总，以水西之役也。其地小而与南丹为仇，互相袭杀，故两土官各退居圉上。南丹州治在圉下而居于上。上司则司治俱在上，而环圉而居者，皆其头目也。南丹第三弟走荔波，为莫俛所执；第四弟走上司，至今为外难，日惴惴焉。其圉圆而大，四面绝壁，惟西北有脊通级而上，路必环旋于下峡，故为天险。峡中水西南下，合塘中及外峡南北诸流，俱透西南腋中坠去。

二十九日 由上司出南门，仍渡门东小水，溯之东北行。一里，蹶土山而上。四里，逾土山西度之脊，其西石峰突兀，至此北尽。逾脊西北行，一里半，岭头石脊，复夹成隘门，两旁石骨嶙峋。由隘西出，转而东北下，半里，下抵坞中。又北一里，复越土山西下脊，是为上司、独山州界。于是下岭循东山行。又二里，有村在西山坞中，为苴查村。其处东西两界皆土山，中开大坞，有水自北来，界于坞中，绕苴查之东，乃西向破峡去。循东界山溯水北向行，又三里，水分二支来：一自西北，一自东北，如“丫”字会于中支山尽处。西北者较大，路溯东北行，一里半，始渡之。于中支山东麓，得坛子窑村，乃土官蒙氏之族也。村北溪中皆碎石，时涸时溢。又东渡之，东北上冈头，共里许，有土环遗址，名曰关上。而无居舍。又东北一里，水尽坞穷，于是蹶岭，其岭甚峻。三里，北逾其脊，隘中底石如铺，两旁有屹立峰，是名鸡公关。其脉自独山州西北，绕州治东南过此，又东南度六寨之东，而下蛮王峰者也。脊西南水，下苴查而入都泥；脊东北水，由合江州下荔波而入龙江。从脊东北眺，则崇山蜿蜒，列屏于前，与此山遥对成两界，中夹大坞自西北向东南焉。

下山，即转北行。一里，抵坞，转东即有小水东南下。又东

一里，逾陟冈阜，忽有溪自西北注东南，水于此复出，为龙江上流矣。渡溪东上，于是升陟坡塋，东北行坞中。五里，有数家之村，在东北山下。从其前复转入西峡，北一里，过一脊，始北向下岭。其下甚深，半里，抵其麓，始知前所行俱在山上也。又北行坞中一里半，有大溪汪然自西峡层山中出，东注而去，亦由合江州而下荔波、思恩者。历石壑而渡其北，又缘西界支陇北行五里，为羊角寨。乃蒙氏之砦也，在西山麓。又北三里，有小水自西坡东注，涉之。又北二里，入独山州之南隘门。其州无城，一土知州，一明知州。土官蒙姓，所属皆土人。即苗仲。明官多缺，以经历署篆，所属皆客户。余所主者，江西南昌人黄南溪也。其人忠厚长者，家有楼可栖。盖是州虽无城，而夹街楼房连属，俱用瓦盖，无复茅栏牛圈之陋矣。独山土官，昔为蒙诏，四年前观灯，为其子所弑；母趋救，亦弑之。乃托言杀一头目，误伤其父，竟无问者。今现为土官，可恨也。

三十日 平明饭，出独山州北隘门，西北向循西界山行。六里，有小水亦自西坡东注，涉之。又北二里，北坞渐穷，山脊自东界西度南转，乃路转东北，涧中小水北流。渡涧，循东界山腋间，东北上，又二里，有水溢路旁石穴间，甚冽。其侧有蒙氏修路碑。从此攀石磴东北上岭，雨大至。一里半，北登岭隘。是岭由东南度西北，乃祖山，从其东北分裂众枝：其直东而去者，为黎平、平崖之脊；东南分枝而下者，为荔波、罗城之派；西北分枝而下者，度此稍北，即西转南走而环于山之西，度鸡公岭而南，为蛮王、多灵之派。独山州南二十里，有山尖起，立于众山之中，是名独山，州之所以得名也。又东北行山峡间，乃下。共二里，有涧自东谷走深崖中，两崖石壁甚逼，涧嵌其间甚深，架石梁其上，为深河桥。过桥，复跻崖而上。登岭而北，有小水自东北泻石崖而下，涉之，复升岭。共一里，遂由峡中北行。又二里，乃下，东北行壑中。有村在东山下，由其前少转西北，共二里，有溪自东北

来，渡之。溯其西岸，东北逾岭二里，一水自东北来，一水自西北来，东北者较大。于是涉西北水，缘中支山而上，东北三里而登其冈。饭于冈上。

乃稍下，又北逾岭而下夹坞中。共三里，又上，有溪自南峡北向下坠深潭中，潭小而高。此西北小溪之源也。又北逾岭下，一里半，下度深壑中，有涧自西南峡中来，至此东向西转。此东北小溪之源也。涉之，西南登岭。半里而上，循岭半西南行。二里，过兔场，西出嘉坑关，随小水西下，由夹中行五里，两夹山多石崖突兀，路侧有泉涌穴出。又西二里，水坠南峡去，路逾北坳上。有寨在东冈之巅，由其西北度脊，南北俱有洼中坠，环膝为田，直抵其底，水皆自底西向透石穴者也。又西逾岭，一里，出隘口。其上石骨棱峭，皆作嘘云裂萼之势。又西北下峡中，一里转而西，半里西出峡，是为独山州与胡家司分界。胡家司即都匀长官司。从姓呼之，以别郡名也。于是山开南北洋，中有大溪自北而南，是为横梁。循溪东转南半里，抵南崖。崖下有卖纷为饷者，以盐少许易而餐之。随溪南岸西行，道路开整，不复以蜀道为苦。溪北有崇庙在高树间。人家田陇，屡屡从断岸而出。共六里，过坞里村。又西一里，其水南曲，乃西流之。从溪西岸南行半里，为邛母村。由村前西转，坞复东西开。而其村重缀冈阜，瓦舍高耸，想亦胡家司之族目也。西二里，其水北曲，复西渡之；又西北一里，其水西曲，又北渡之。从北岸悬崖西行一里半，有水自西来会，乃麦冲河也。即溯河西行二里，入麦冲堡南隘门而宿。是晚，雷雨大作，彻夜不止。

四月初一日 平明起，雨渐止。饭间闻其西有桃源洞，相去五里，须秉炬深入，中多幡盖缨络之物。觅主人导之不得，曰：“第往关上，可西往也。”遂北向出隘门，溯溪东岸行。忽石壁涌起岸东，势极危削，溪漱之南，路溯之北，咫尺间，上倚穹崖，下循迅派，神骨俱竦。三里，转入东坞，其北有小峰立路

隅，当麦冲河南下之冲；有岩北向，曰观音洞。又北半里，曰麦冲关。问所谓桃源洞者，正在其直西大峰之半，相望不出四里外。关之东有真武阁，南向正与观音洞门对。乃停行李于阁中，觅火炬于僧，将往探之。途遇一老者曰：“此洞相去不远。但溪水方涨，湍急不可渡，虽有导者，不能为力，而况漫试乎？”余乃废然而返。

取行李西南越而下，抵河东岸。溯之北，共一里，有溪自西北山腋来，路从东北山腋上，遂与麦冲河别。当坡路潦迹间，有泉泛泛从下溢起，孔大如指。以指探之，皆沙土，随指而溷，指去而复溢成孔。乃气机所动，而水随之，非有定穴也。一里，转上后峡，遂向南入。又一里，峡更东去，路复从北峡上。其处石峰嶙峋，度脊甚隘。越隘北下坞中，被垄盈坞，小麦青青荞麦熟，粉花翠浪，从此遂不作粤西茺态。粤西独不艺麦。脊东西乱水交流，犹俱下麦冲者。又东一里，转而北，有坞南北开洋，其底甚平，犁而为田，此处已用牛耕，不若六寨以南之用概橇矣。波耕水耨，盈盈其间，水皆从崖坡泻下，而不见有浚浚之迹。二里，有村颇盛，倚西峰下，曰普林堡。又北一里，逾岭而上石峰，复度峡而下，转而东，平行石岭间。一里东下，盘窝中有小石峰圆如阜，盘托而出，路从之，经窝东入峡。一里，复北向升岭，一里，遂逾土脊之上。此脊当为老龙之干，西自大、小平伐来，东过谷蒙、包阳之间，又东过此，东南抵独山州北，又东为黎平、平崖之脊，而东抵兴安，南转分水龙王庙者也。越脊北下，峡壁甚隘。一里，下行峡中，有水透西南峡来入，北随峡去，渡之，傍涧西涯行。有岐路溯水西南峡，则包阳道，通平浪、平洲六洞者也。随水东北行峡中，又三里，转而东，其峡渐开，有村在南山间，曰下石堡。又北二里，过一巨石桥，涧从桥下西北坠深峡中而去，路别之。

东北逾岭，升降二重，又二里，越岭下，则东南山坞大开，

大溪自西北破峡出，汤汤东去，是曰大马尾河。以暴涨难渡，由溪南循山崖东行，溪流直捣崖足。一里，东抵堡前，观诸渡者，水涌平胸，不胜望洋之恐。坐久之，乃解衣洒水而渡，从北岸东向行；水从东南峡去，别之，乃东北逾岭而下。共三里，东渡小马尾河，复东北升岭。一里半，越岭脊东下。一里半，出山峡，山乃大开，成南北坞，东西两界，列山环之，大河汤汤流其间，自北而南。溯溪西岸，循西界山北行一里，路旁即有水自西峡东向入溪。涉之，又北二里，有石梁跨一西来溪上。渡之，从梁端循峡西入，是为胡家司，即都匀长官司也；以名同本郡，故别以姓称。又北一里，有村在西山崖上，曰黄家司，乃其副也。又北行田塍间五里，度西桥。又北半里，入小西门，是为都匀郡城。宿逆旅，主人家为沈姓，亦江西人。

初二日 晨起作书投都匀司尊张。勉行，四川人。乃散步东入郡堂，堂乃西向蟒山者。又东上东山麓，谒圣庙。见有读书庑东者，问南皋邹总宪成都时遗迹，曰：“有书院在东门内。”问《郡志》，其友归取以示，甚略而不详，即大、小马尾之水，不书其发源，并不书其所注，其他可知，载都八景，俱八寸三分帽子，非此地确然特出之奇也。此地西门大溪上有新架石梁，垒石为九门甚整，横跨洪流。乃不取此，何耶？

都匀郡城东倚东山，西瞰大溪。有高冈自东山西盘，而下临溪堑；溪自北来，西转而环其东。城圆亘冈上，南北各一门，西有大小二门，东门偏于山之南；城后环东山之巅，其上有楼，可以舒眺。郡西对蟒山，为一郡最高之案，郡治、文庙俱向之。其南峰旁耸，有梵宇在其上，须拾级五里而上。以饭后雨作不及登。谓之蟒者，以峰头有石脊，蜿蜒如巨蛇。今《志》改为龙山。九龙洞在城东十里。按《一统志》有都匀洞，在都匀长官司东十里，前门北向，后门南向，当即此洞。今《志》称为仙人洞二，下注云：“一在城东，一在城西。”殊觉愤愤。水府庙

在城北梦遇山；大溪南下横其前，一小溪西自蟒山北直东来注。下有白衣阁，倚崖悬危壁上，凭临不测；上有梵音洞，西向为门。洞无他致，止云其中有石佛自土中出者为异耳。

初三日 下午自都匀起身，二十里，文德宿。

初四日 三十里麻哈州，又十里，乾溪宿。

初五日 十里，麻哈大堡，又十里，乾坝哨，又十五里，平越卫。

初六日 歇平越。

初七日 宿店。

初八日 雇贵州夫行，至崖头宿。

初九日 新添饭，至杨宝宿。

初十日 龙里歇。

十一日 二十里，至鼓角，三十里，至贵州。

十二日 止贵州，游古佛洞。

十三日 止贵州，寓吴慎所家。

十四日 晨饭于吴，遂出司南门，度西溪桥，西南向行。五里，有溪自西谷来，东注入南大溪。有石梁跨其上，曰太子桥。此桥谓因建文帝得名，然何以“太子”云也。桥下水涌流两崖石间，冲突甚急，南来大溪所不及也。度桥溯南来大溪，又西南三里，有一山南横，如列屏于前。大溪由其东腋北出，路从其西腋南进。又南行峡间二里，历东山之嘴，曰岜堰塘，其西南有双峰骈起，其东即屏列山之侧也。又三里，过双骈东麓而出其南，渐闻溪声遥沸，东望屏列之山，南进成峡，溪形复自南来捣峡去，即出其东北腋之上流矣。第路循西界山椒，溪沿东界峰麓，溯行而犹未覩面耳。又南二里，始见东溪汪然，有村在东峰之下，曰水边寨。又南三里，曰大水沟，有一二家在路侧，前有树可憩焉。又南渐升土阜，遂东与大溪隔。

已从岭上平行，五里，北望双骈，又三分成笔架形矣。南行

土山峡中，又一里出峡，稍折而东，则大溪自西南峡中来，至此东转，抵东峰下，乃折而北去。有九巩巨石梁，南北架溪上，是为华伾佬桥，乃饭于桥南铺肆中。遂南向循东峰之西而行，皆从土阪升陟，路坦而宽。九里，见路出中冈，路东水既东北坠峡下，路西水复西北注坑去，心异之。稍下冈头，则路东密箐回环，有一家当其中，其门西临大道。有三四人憩石畔，因倚杖同憩。则此冈已为南北分水之脊矣。盖东西两界，俱层峰排闥，而北冈中横其间为过脉，不峻而坦，其南即水南下矣，是云独木岭。或曰头目岭。昔金筑司在西界尖峰下，而此为头目所守处。从岭南下，依东界石山行。五里，复升土岭，渐渐东南，岭头有一洼中坠，从其东又南向而止，共二里，乃下。一里，则有溪自西北峡中出，至此东转，石梁跨之，是为青崖桥。水从桥下东抵东界山，乃东南注壑去，经定番州而南下泗城界，入都泥江者也。于是又出岭南矣。度桥而南，半里，入青崖城之北门。其城新建，旧紆而东，今折其东隅，而西就尖峰之上，城中颇有瓦楼闾閻焉。是日，晴霁竟日，夜月复皎。

青崖屯属贵州前卫，而地则广顺州所辖，北去省五十里，南去定番州三十五里，东北去龙里六十里，西南去广顺州五十里。有溪自西北老龙脊发源，环城北东流南转。是贵省南鄙要害，今添设总兵驻扎其内。

十五日 昧爽，出青崖南门，由岐西向入山峡。南遵大路为定番州道。五里折而南，又西南历坡阜，共五里，有村在路北山下，曰蓊楼，木树蒙密，小水南流。从其西入山峡，两山密树深箐，与贵阳四面童山迥异。自入贵省，山皆童然无木，而贵阳尤甚。西北入峡三里，遂西上陟岭。一里逾岭西下，半里有泉出路旁土中，其冷彻骨，南下泻壑去。又西下半里，有涧自北峡来，横木桥上，其水南流去，路西渡之。复北上岭一里，逾脊西，有泉淙淙，随现随伏。西北行两山夹中，夹底平洼，犁而为田，而中不

见水。又西北半里，抵西脊，脊东复有泉淙淙，亦随现随隐。盖此中南北两界俱穹峰，而东西各亘横脊，脊中水皆中坠，不见洼底，故洼底反燥而不滞。越西脊而下，西北二里，路北有悬泉一缕，自山脊界石而下；路南忽有泉声淙淙成涧，想透穴而出者。半里，转而西行，又半里，得一村，在北山下，曰马铃寨。路由寨前西向行，忽见路南涧已成大溪；随之西半里，又有大溪自西峡来。二溪相遇，遂合而东南注壑去。此水经定番州，与青崖之水合而下都泥者也。于是溯西来大溪之北岸，又西向行二里，为水车坝。坝北有土司卢姓者，倚庐北峰下；坝南有场在阜间，川人结茅场侧，为居停焉。坝乃自然石滩横截，涧水飞突其上，而上流又有巨木桥架溪南北，其溪乃西自广顺来。广顺即金筑安抚司，乃万历二十五年改为州，添设流官。由溪北岸溯流转入，为广顺州道；由溪南岸逾岭上，为白云山道；随溪东南下，为定番州道。乃饭于川人旅肆。送火钱，辞不受。

遂西南一里，逾岭。又行岭夹中，一里半，乃循山南转，半里，又东入峡。半里峡穷，乃东南攀隘上。其隘萝木蒙密，石骨逼仄。半里逾其上，又东南下，截壑而过。半里，复东南上，其岭峻石密丛更甚焉。半里，又逾岭南下，随坞南行。一里是为八垒。其中东西皆山，南北成壑，亦有深坎，坠成智井，而南北皆高，水不旁泄者也。直抵壑南，则有峰横截壑口，西骈隘如阙，东联脊成岭。乃东向陟岭上，一里，逾其脊，是为永丰庄北岭，即白云山西南度脊也。乃南向下山，又成东西坞。有村在南山下，与北岭对，是为永丰庄。从坞中东向行二里，得石磴北崖上，遂北向而登。半里，转而西，半里，又折而北，皆密树深丛，石级迤逦。有巨杉二株，夹立磴旁，大合三人抱；西一株为火伤其顶，乃建文君所手植也。再折而西半里，为白云寺，则建文君所开山也，前后架阁两重。有泉一坎，在后阁前楹下，是为跪勺泉，下北通阁下石窍，不盈不涸，取者必伏而勺，故名曰